

DAP, PKR Boikot PAS Di Rompin?

MStar

Mei 1, 2015

Oleh: SOFEA SUSAN ALBERT KASSIM

MUADZAM SHAH: Memasuki hari kesembilan kempen PAS pada Pilihan Raya Kecil (PRK) Parlimen Rompin, kelibat pimpinan tertinggi sekutunya, DAP masih tidak kelihatan.

Menurut sumber dalaman yang rapat dengan Parti Keadilan Rakyat (PKR), salah satu faktor ketidakhadiran pemimpin tertinggi DAP adalah bagi meredakan krisis antara PAS dan DAP.

Malah, menurut sumber itu juga ia bagi mengelakkan isu hudud yang masih panas terus dibangkitkan sehingga boleh menjejaskan tumpuan pakatan rakyat pada PRK Rompin dan Permatang Pauh.

"Memang tak dapat dinafikan tumpuan lebih kepada Permatang Pauh tapi pembahagian pemimpin untuk turun padang itu ada.

"Kalau di Permatang Pauh DAP 90 peratus, PAS 10 peratus... kalau di Rompin PAS 90 peratus, DAP 10 peratus. Kerjasama itu masih ada," kata sumber ketika ditemui dalam satu majlis ramah mesra calon PAS di Kampung Kedaik pada Khamis.

Ketika diminta mengulas sama ada ketidakhadiran pemimpin DAP di Rompin ada kaitan dengan krisis hubungan dengan PAS, sumber itu bagaimanapun mengelak untuk menyentuh isu berkenaan.

Sebaliknya, beliau hanya berkata DAP tiada cawangan di Parlimen Rompin dan jumlah pengundi Cina agak kecil.

Dua nama besar yang hadir pada hari penamaan calon tempoh hari adalah Naib Presiden Parti Keadilan Rakyat (PKR) Nurul Izzah Anwar dan Tian Chua, tetapi kelibat mereka tidak kelihatan pada waktu kempen.

Sejak akhir-akhir ini keretakan hubungan antara tiga sekutu pakatan pembangkang semakin parah apabila PKR dan DAP menolak pelaksanaan hukum hudud di Kelantan yang diperjuangkan PAS.

DAP mengambil keputusan untuk memutuskan hubungan dengan Pre-siden PAS, Datuk Seri Abdul Hadi Awang yang disifatkan tidak bermaruah dan jujur berikutan tindakan parti itu bertegas mahu melaksanakan hudud di Kelantan.

Hakcipta Terpelihara © 2015 Star Publications (M) Bhd (Co No 10894-D)

Source: <http://www.mstar.com.my/berita/berita-semasa/2015/05/01/dap-boikot-rompin/>